

D O V B L E

DE

LA RESPONCE

DE LA ROYNE REGENTE

M E R E D V R O Y,

A LA LETTRE ESCRITE

A SA MAIESTE,

*Par Monseigneur le Prince de Condé,
le 19. Feurier 1614.*



A PARIS,

Chez P I E R R E C H E V A L I E R, rue S.
Iacques, à l'Image saint Pierre,
pres les Mathurins.

M. D. C. X I I I.

Avec permission.

312 V O 1

36

3370021

Case
F

39

3370021 337734326

THE NEWSPAPER
LIBRARY

1614 md



312 V O 1

3370021

337734326

3370021

DOVBLE DE LA RESPONCE
de la Royne Regente, Mere du Roy, à la
Lettre escrite à sa Majesté, par Mon-
seigneur le Prince de Condé, le 19. de
Feurier 1614.

MON Nepueu, Vostre lettre escrite à Mezieres, le dixneuuesme de ce mois, m'a esté presentee le vingt-vniesme. Elle contient plusieurs chefs, ausquels ie voulois attendre à respondre particulièrement, lors que les Estats generaux du Royaume seroient assemblez; puis que le Roy, Monsieur mon fils, & moy auions ja arresté, par l'aduis des Princes & Officiers de la Couronne, & autres principaux Conseillers du Roy, mondit sieur & fils, qui sont auprès de nous, d'en faire la conuocation, dont nous auions donné aduis par les Prouinces deuant la reception de vostredite lettre; comme vous eussiez appris de mon Cousin le Duc de Ventadour, & du sieur de Boissize, que i'auois despeschez vers vous, si vous ne fussiez party de vostre maison de Chasteauroux, pour passer en Champagne, comme vous auez fait (sans nous en donner aduis) au mesme temps qu'ils s'acheminoyent à vous: Ou si depuis vous leur eussiez mandé approuuer qu'ils fussent allez où vous estes, comme ils s'y sont offerts par leurs lettres, qui vous ont esté portees par homme exprez. I'ay eu à plaisir de cognoistre par la lecture de vostredite lettre, que vous approuuez ladite assemblee: Car c'est vn bon remede pour pourueoir aux desordres que vous dites auoir cours dedans le Royaume: C'est ainsi celuy qui a

tousiours esté plus estimé, & désiré de moy, & duquel
 ie faisois bien estat d'vser, à l'entree de la majorité du
 Roy, mondit sieur & fils, pour luy représenter en vne
 si notable compagnie, le passé de ma Regence, l'in-
 former du present, & mieux regler toutes choses
 pour l'adueir, que ie n'ay peu faire, à mon grand re-
 gret, durant mon administration: Mais comme de-
 puis vous auez enuoyé vne copie de ladite lettre à
 Messieurs de la Cour de Parlement de ceste ville,
 j'ay creu que vous la diuulgueriez encores par toutes
 les autres compagnies & Prouinces du Royaume,
 pour, en mesme temps, descrire par tout, com-
 me il semble, que vous pretendez faire icy,
 la direction & conduittre des affaires publiques
 aupres de moy, à mon desauantage: Car les plain-
 tes que vous faictes, des desordres que vous attri-
 buiez à ceux qui seruent le Roy aupres de moy,
 s'adressent plus à moy qu'à eux: C'est vn artifice
 dont l'on vse à poste, pour donner aux subjects
 du Roy vne mauuaise odeur & impression de mes
 actions. C'est pourquoy j'ay bien voulu, en attendant
 la tenuë desdits Estats generaux, que i'auanceray tant
 que ie pourray, vous faire sçauoir, par aduance, ce qui
 est contenu en la presente. Je commenceray donques
 par vous dire, mon Neveu, que vous & toute la Fran-
 ce estes obligez, quoy que vous puissiez dire & pu-
 blier au contraire, de recognoistre & confesser, que le
 Royaume a par la singuliere grace de Dieu, & l'assi-
 stance que j'ay receuë des gens de bien, joüy en ma
 Regence, contre l'opinion commune, d'un repos ge-
 neral, & plus entier que nous n'eussions osé esperer,
 apres auoir perdu le feu Roy mon Seigneur, que Dieu
 absolue (la seule presence duquel contenoit toutes
 sortes de personnes en deuoir & obeissance,) dont ie

ne puis louer assez sa bonté, & prouidence diuine, & les bons François de toutes qualitez, qui ont en cela fidellement seruy le Roy mondit sieur & fils, au grãd besoin que i'en ay eu: Car chacun a sceu & veu quelles ont esté mes peines, mes combats, & mes continuelz travaux, pour maintenir la tranquillité publique, qui est encores maintenant enuiee, & trop rudement & ouuertement assaillie par ceux qui deuroiẽt moins le faire: Ils ont commencé dès le sacre du Roy mondit sieur & fils, & ont depuis continué, comme ils font encores, par l'ordre & direction d'un mesme conseil. I'aduoie librement auoir quelquesfois eu recours à des moyens peu conuenables à la dignité du Roy mondit sieur & fils, pour contenir & retenir en deuoir les autheurs de telles trauerses: mais ie l'ay fait pour euitier pis: ce qui a esté souuent aussi mal reconnu qu'il est à present mal interpreté par ceux mesmes qui en ont profité. C'est la cause principale des despences que vous nommez à present prodigalitez, que la necessité du Royaume a extorquées de moy contre ma propre volonté, & qui n'eussent eu lieu, si vous m'eussiez aussi assiduelement fortifiée de vostre assistance que ie l'ay desirée, & vous ay donné occasion de faire, par l'entiere & honorable part que vous auez tousiours eue en la conduite des affaires, par preference à toutes autres, comme il est deu à vostre qualité. Mais ie ne puis que ie ne me plaigne à vous, de quoy vous auez laissé couler & passer quatre années de ma Regence, sans m'auoir aduertie des maluersations sur lesquelles vous fondez vostre mescontentement: Car si vous me les eussiez descouuertes, i'y eusse apporté l'ordre necessaire pour le biẽ du Royaume, auquel vous auez un notable interest: Tellement qu'il semble que l'on ayt voulu exprès faire un amas de tel-

les plaintes, (qui sont toutesfois autant imaginaires que peu veritables) pour donner pretexte aux factions & mouuemens qui menacent le Royaume de desolation, ou de dissipation, au lieu d'une reformatiō que vous dites rechercher. A quoy ie voy, avec desplaisir, que l'on vous engage cōtre vostre volonté: Car vous auez vn interest si remarquable, de conseruer ceste Couronne entiere, & en felicité, que ie ne veux point douter que vostre intention ne tende à toute autre chose: Mais pour y paruenir plus honorablement, & vtilement, vous ne deuiez vous esloigner de moy, ny commencer par former vne societé qui en engendrerait d'autres. Car toutes diuisions & partialitez en vn Royaume sont de tres dangereuse cōsequence. Tant s'ē faut que i'en aye approuué vne seule, que ie les ay toutes detestees, principalement si tost que ie me suis apperceuë que l'on vouloit s'en seruir, plus pour aduantagez les particuliers, que pour biē faire au seruice du Roy: Au contraire, i'ay tousiours desiré, comme ie fais encores, de moyenner de tout mon pouuoir, vne bonne intelligence entre tous les Princes, Officiers de la Couronne, & les autres Seigneurs du Royaume, mais i'y ay tousiours esté trauersee, & empeschee par les mesmes inuentions, & artifices de ceux qui fomentēt encores à present celle qui se presente. Et toutesfois ils osent encores imputer aux conseils que i'ay suivis, les factions que ie condamne, de quoy i'ay souuēt fait plainte à ceux que i'ay estimez y pouoir apporter quelque remede. Si i'ay commandé l'observation exacte des Edicts faicts par le feu Roy, pour asseurer la paix du Royaume, ainsi que i'ay souuent fait, & reïteré avec grād soin, affection & sincerité: L'on a publié que ie faisois tels commandemens si precis, exprés pour mieux surprēdre ceux de la Re-

ligion pretenduë reformee, qui s'y endormiroient. Et s'est-on seruy, pour les ombrager d'auantage, des alliâces que nous auôs traitées du costé d'Espagne, cōme si elles estoient basties exprés contr'eux, & leur a-on aussi celé, ou desguisé à mesme fin, celle que nous traitons à present en Angleterre, par vostre aduis, de laquelle mon cousin le Duc de Bouillon a esté le principal entremetteur. D'ailleurs, si quelque fois i'ay vſé d'indulgence à l'endroit d'aucuns de ladite Religion, apres auoir commis quelque excez contre la Iustice, la raison & lesdits Edits, ils ont blasmé ma toleranee & patience, l'ont descritee & interpretee à mauuaise fin. Et toutesfois il est certain, si vous auez esté au-prez de moy quand tels accidens sont arriuez, n'auoir en tels cas, ny autres qui ont concerné le public, rien ordonné à vostre desſeu. Telles personnes eussent, peut estre, desiré que i'eusse vſé de plus grâde seuerité en telles rencontres, tant par vengeance particuliere, que pour engendrer noise, ennuyez de la duree de la concorde & paix au Royaume. Que n'a-il esté tenté & inuenté pour exciter des mescontentemens, former des partialitez & factions, esmouuoir les peuples à sedition par diuers moyens, par gens impatiens de voir croistre le Roy avec son aage en iugement, courage, & en la cognoissance du bien & du mal qu'il reçoit de ses seruiteurs & sujets. Tels offices ont esté faicts curieusement, pour, en trauersant la conduite des affaires publiques, establir celles des particuliers. Et tout ainsi que i'ay trauaillé syncerement à maintenir la paix du Royaume, en faisant exactement obseruer & executer lesdits Edits: ie n'ay pas esté moins soigneuse & diligente à conseruer les amitez des Alliez, & confederez de la Couronné, tellemēt que i'en ay plustost accru, que diminué le nombre: Veri-

tablemēt i'ay preferé ladite alliance d'Espagne à celle de Sauoye, mais ie n'ay rien faict en cela que le feu Roy mon Seigneur n'eust faict lors que Dom Pedro de Toledo vint vers luy de la part du Roy d'Espagne, s'il luy en eust faict l'ouuerture, comme ils'y attendoit. Depuis ie m'y suis conduite entierement par l'aduis de feu mon cousin le Comte de Soissons qui estoit auprez du Roy, quand la premiere proposition en fut faicte, laquelle vous fut cōmuniquee par moy & par ledit comte à vostre retour de Guyenne, & fut deslors approuuee de vous comme de luy, & de tous ceux qui en eurent cognoissance, comme vtile, bien proportionnee à l'aage & à la grandeur du Roy : Et puis affermer n'auoir esté pousseé à ceste preference par defect d'affection & bonne volonté enuers mon frere le Duc de Sauoye & sa maison, ny à autres fins que de la cōsideration du merite d'une telle alliance, & de l'affermissemēt de la paix entre ces deux Roys, vtile à la Chrestieté, & plus necessaire à l'Estat presēt des affaires du Royaume, qu'en autre saison: De quoy ledit Duc de Boüillon fut chargé d'esclaircir le Roy de la grande Bretagne, où le Roy & moy l'enuoyasmes exprés pour faire cest office, qui fut rendu semblable en mesme temps aux autres Princes, Potentats, & Alliez de ceste Couronne, qui ont tous monstré les auoir receus en bonne part: Je diray dauantage, que les motifs du Cōseil qui en fut lors pris, n'ont esté moins considerables pour ledit Duc de Sauoye, & ses Estats, que pour la France. Vous en sçauiez les raisons comme moy: mais tels blasment à present lesdits Conseils & mariages, qui ne feroient peut estre conscience de se preualoir au desauantage du Roy, mondict sieur & fils, & du repos de la France, d'une mauuaise intelligence entre ces deux Roys.

C'est

C'est pourquoy ils vsent encores à present de toutes sortes d'artifices, & de diligences pour en retarder l'execution, en intention de les rompre du tout, s'ils le peuuent faire. Mais i'espere que nous sçaurions bien y remedier, avec l'ayde de Dieu, qui favorisera, s'il luy plaist, nos synceres intentions, qui n'ont autre but que de procurer le bien du Royaume, avec le contentement particulier du Roy, & le bien de ma fille aisnee, tout ainsi que i'espere faire pour la seconde, du costé d'Angleterre, dequoy vous ne faites mention par vostre-dicte lettre, celà nuiroit aussi au dessein de ceux qui vous conseillent: I'espere de sortir amiablement, à l'honneur du Roy, & au bien, & contentement de ses subjets, des differents de Navarre, mesmes deuant que nous passions outre ausdits mariages, sinon, i'auray tel soin de conseruer, en ceste occasion, les droicts, les limites, & la reputation de la France, que ceux qui nous accusent de n'en auoir le soin que i'en dois auoir, auront occasion de s'en desdire, & de retrancher de leurs plaintes celles qu'ils fondent sur ce sujet. Mais quoy? ils voudroient desia nous voir aux prises, & aux armes avec le Roy d'Espagne, pour s'en preualoir en leurs imaginations: Tant s'en faut aussi que l'on aye sujet de se plaindre de l'assistance du Roy, mondit sieur & fils, & de la mienne aux affaires de Montferrat, que i'attendois des louanges, & des remerciemens du soin que i'en ay eu. Car il est notoire à tous, si mon Nepueu le Cardinal de Mantouë (que i'affectionne beaucoup, avec toute sa maison, à cause de son affection enuers la France, & de nostre proximité) iouyst à present de quelque allegement en ses affaires, il doit estre attribué au secours, & aux offices de vraye amitié, que le Roy, mondit sieur, & fils, & moy, luy auons departis

en ceste necessité, lesquels nous aurons tousiours à plaisir de luy continuer, autant que les affaires du Royaume nous le permettront : Car ie suis obligée, comme vous sçauiez, de preferer celle-cy à toutes autres, dequoy si i'vsois autrement vous me blasmeriez avec raison le premier : Comme ie ne puis faire assez ceux qui reprennent, ou condamnent les deuoirs qui ont esté faits pour faire considerer, & poiser, comme il conuient, les raisons qui importent à la France, sur la nouvelle poursuite des Venitiens, pour le renouvellement de leur alliance, avec les Lignes Grises, dignement representees par l'Ambassadeur du Roy, qui reside ausdites Lignes, deuant que d'y engager le nom, & la reputation du Roy : Considererez ie vous prie, à quels termes de mesconnoissance enuers le bien public du Royaume, les passions priuees, desuoyent ceux qui blasment nostre conduite en ce fait. Car ils veulent que ie passe par dessus toutes sortes de raisons, & considerations, quelques importantes qu'elles soient au Roy, & au Royaume, pour suivre leurs opinions, soit pour flatter ladite Republique, ou pour auoir sujet de fomentier & accroistre d'auantage la desiance desdites alliances d'Espagne, comme si la seule consideration des interests d'Espagne nous retenoit de contenter ladite Republique, & fauoriser ladite alliance, chose qui est tres-esloignée de la verité. Mais il ne faut que lire les despêches de nostre Ambassadeur, & se ressouuenir des accidens suruenus à ceste nation Grisonne, apres la premiere ligue de Venise, pour condamner la plainte que l'on fait de ma conduite en cecy. Ladite premiere ligue fut veritablement fauorisee par le feu Roy : mais il s'en repentit assez quand il vit qu'elle preiudicioit à la sienne (qui couste cher à la France,) & auoit

plongé ceste nation en des confusions & calamitez tres-grandes, dont la memoire leur est tous les iours rafraischie quand ils iettent les yeux sur le fort des Fuentes, basti à la frontiere de leur pays, apres que ladite ligue de Venise fut faite, & à l'occasion d'icelle: Et neantmoins comme le Roy, mondit sieur & fils, & moy, desirons grandement favoriser ladite Republique, à l'imitation du feu Roy, & de ses predecesseurs, Nous auons ordonné que les capitulations de leur premiere alliance, soyent veuz pour retrancher & reformer celles qui peuuent nuire & affoiblir celle de France, Dequoy l'Ambassadeur de la seigneurie doibt conferer avec ceux du conseil du Roy. Ceste procedure ne peut estre iustement reprise & blasmee, Mon Nepueu, que par ceux qui cherchent querelle, & preferent leurs passions au bien de la France. Mais que y a il que l'on n'inuente, & que l'on ne publie pour descrire ma Regence, & les seruiteurs du Roy qui trauaillent iournellement aupres de moy, pour s'acquitter fidellement de leurs charges. Nous voyons clairement que l'on s'adresse à eux, pour en espargnant mon nom, en papier, faire tomber sur moy, par effect, les reproches, dont l'on les charge. Tant y a que personne ne peut nier que le Royaume ne iouisse à present d'une felicité plus digne d'admiration, & par tant d'honneur, & de loiange pour ceux qui seruent, que d'aucun reproche: Ce sont gens vieilliss dedans les affaires publiques, & les charges qu'ils exercent: Si le soin qu'ils y employent avec beaucoup de fidelité, d'enuie & de labour doit estre baptisé du tiltre d'ambition, & conuoitise de gouverner, l'auoüe qu'ils sont coupables: En tout cas, Mon Nepueu, les fautes sont personnelles, Si aucun d'eux s'est tant oublié que de manquer au deuoir de

sa charge, & mesmes à vous seruir, i'entends plustost le condamner que de l'excuser. Mais ie sçay qu'ils en ont vsé autrement, & que vous auez plus de sujet de vous louer de l'honneur qu'ils vous ont tousiours rendu, & du seruice qu'ils vous ont fait aupres du Roy, & de moy, & au public, que vous n'auiez de les tenir pour tels que vous les despeignez, & neantmoins ie veux me plaindre à vous, de vous estre par trop déshonoré de vostre creance, & puissance enuers moy, & de mon affection enuers vous, d'auoir laissé passer tant de temps depuis ma Regence, sans m'auoir descouuert leurs deportemens, si vous les auez recogneus preiudiciables au public: car i'y eusse pourueu par vostre bon aduis, & me promets tant de la reuerence qu'ils portent à mes volontez, & à vostre personne, que seulement pour nous complaire, & se descharger du fardeau qu'ils supportent, & contenter le public, ils auroient librement eux mesmes remis leurs charges en ma disposition, au premier signe qu'ils en eussent receu de moy, comme ils m'ont particulierement & publiquement déclaré sur vostre dite plainte, qu'ils sont encores prests à faire à la premiere semonce qui leur en sera faite de ma part: Par ceuillage ma condition seroit bien dure, & mon pouuoir restreint, s'il ne m'estoit loisible de remunerer de biens, & d'honneur, (sans faire preiudice au Roy, & au public) vne longue seruitude accompagnée d'une fidelité esprouuée: Voudriez-vous estre réduit à tels termes pour ceux qui vous seruent? Vous nous auez bien fait cognoistre que vos prétentions & intentions sont bien eslongnées de ceste restriction, laquelle aussi doit estre iugée de vous peu equitable pour les autres: Semblablement ie recognois que le Roy eust esté mieux seruy, si nous eussions re-

glé vn Conseil pour les affaires d'Estat, composé seulement de vous, & des autres Princes, avec les officiers de la Couronne. Mais qui a plus désiré cela, & qui a plus trauaillé que moy, à quoy veritablement i'ay esté mal assistée de tous, & toutesfois maintenant vous vous seruez de ce suiet, & de la confusion dudit Conseil, pour descrire les seruiteurs du Roy, & le gouuernement: Seroit-ce pas vn grand honneur & aduantage, & vne pareille descharge pour ceux qui les manient à cause de leurs offices, si les depesches à mesure qu'elles sont receuës, & que les responces sont ordonnees & dressées, elles estoient leuës en vn Conseil reglé & composé de personnes de telle qualité, & pour le moins leur labeur, & leur diligence, avec leur suffisance seroient mieux cogneuës, & toutes choses seroient veritablement mieux ordonnees: Vous deuez vous souuenir, que voyant que ie ne pouuois paruenir à la reduction & reformation dudit Conseil, par faute d'assistance, i'auois trouué bon que ceux qui ont les charges des depesches, & des finances vous vissent par fois en vostre maison, & receussent vos aduis sur icelles, pour les me représenter, pour vous tesmoigner l'estime que ie faiets de vous, & de ma confiance en toutes choses. Mais vous vous estes plustost lassé de cest ordre, que vous n'avez fait paroistre d'en désirer la continuation: Outre cela on a voulu vous faire trouuer mauuaise mon entree au Conseil des affaires des provinces, comme si ma presence deuoit y estre incompatible avec la vostre, & en quelque sorte retrancher le respect qui vous est deu, chose veritablement qui seroit aduenüë contre mon intention: l'aduouë bien, d'estre tres jalouse du bié des affaires du Roy. Mais de qui dois-je esperer d'estre mieux secondee en cela que

de vous, eſtât ce que vous eſtes? Or mon nepueu pour bien faire au public, vous deuiez demeurer aupres du Roy, & de moy, voſtre qualité de premier Prince du ſâg vous euſt donné toute creâce & auctorité pour eſtre oüy, & creu, ſans autre aſſiſtance que de la iuſtice, & de la verité de voſtre remonſtrance. Vous euſſiez cognu & eſprouué par vrays effects, que mon affection enuers le public ſurmonte de beaucoup celle que ie rêds aux particuliers de toutes qualitez. Vous m'eufſiez trouuée tres-deſireuſe de la conuocation, & du remede deſdits Eſtats generaux pour eſtre tenus en la forme ancienne en laquelle chacun trouuera la ſeureté & liberté qu'il conuient, pour y comparoiſtre, & y bien ſeruir le Roy, & le public, ſouz la protection de ſon auctorité ſouueraine, & de ſa iuſtice, telle qu'elle doit eſtre attenduë, & deſiree de tous. Mais prenez garde que ſouz pretexte de la demande, que l'on vous fait faire en termes generaux de rendre leſdits Eſtats, ſeurs & libres, l'on ne minute & proiecte deſia des difficultez pour éluder & aneantir ladiſte aſſemblée, & en auorter le fruiſt deuant ſa naiſſance au preiudice du public, contre voſtre attente, & voſtre propoſition. Ceux qui auroient ce deſſein eſtimeroyent neantmoins de n'auoir peu gaigné, en faueur de leur party, d'auoir par anticipation ſemé dedans les eſprits des hommes, l'eſperance de ladiſte aſſemblée: fondée ſur ladiſte reformation, quant bien elle deuroit après tourner en fumée, pour renuerſer ſur les autres vn meſcontentement general de l'interruption d'icelle, duquel ils ſeroyent neantmoins ſeuls cauſes: Ce que vous m'auiez mandé auoir eſté delibéré icy d'arreſter la perſonne dudiſt Duc de Bouillon, me dône ce ſoupçon. Car comme tel aduis eſt imaginaire, faux, & plein d'artifice procedant

d'une profonde malice, ie ne puis que ie n'aprehende
dés à present la rencontre à l'aduenir, de semblables
ruzes, & inuentions, mesmes lors qu'il faudra donner
entrée à ladite assemblée d'Estats, Partant vous y ad-
uiserez, & y pouruoierez de bonne heure : Mais ie ne
puis bonnement croire que mon Cousin le Duc de
Longueuille ayt rapporté que ie luy aye refusé d'aller
en son gouuernement, bien l'auoyf - je moy mesme
prié d'attendre quelques iours à partir, pour resoudre
auec luy les Estats des garnisons, & fortification des
places dudit pays, en la forme accoustumée, à quoy il
eust trouué à redire, & à se plaindre, si i'y eusse tou-
ché sans luy. De sorte que i'ay bien plus grande, &
iuste cause de me douloir de luy, de quoy m'ayât après
diuerses instances, fait asseurer qu'il me donneroit ce
delay, il s'est desrobé de nous à heure induë, pour tes-
moigner à tout le monde la mesfiance qu'il a de ma
foy, laquelle n'a toutesfois encore defaillly à person-
ne viuante, graces à Dieu: ce proceder fut cause, que
m'ayant esté rapporté que le Duc de Vendosme auoit
longuement conseré auec ledit Duc de Longueuille,
le mesme iour de son depart : ioinct les diuers & fre-
quents aduis qui m'estoient donnez des preparatifs
qu'il faisoit, pour, à son imitation, se desrober : Je
pris conseil, meüe du soin que ie veux auoir de sa
fortune, & de sa reputation, pour le respect que ie
dois, & veux rendre toute ma vie à la memoire du
feu Roy, mondit Seigneur, de le faire retenir en sa
chambre, dedans le Louure, non à autre fin que pour
le garantir d'une desobeyssance, en laquelle ie le
voyois prest à se precipiter, ce qu'il a mal recogneu,
& veritablement sa faute & mesconnoissance en cela,
est plus blasmable en luy qu'en vn autre; Vous en
sçaez les raisons, que vous auez quelquesfois em-

ployees pour l'accuser, & le reprendre; mais c'estoit lors que ledict Duc-auoit recours à d'autres qu'à vous, pour estre supporté en ses ieunesses. Quant à la Citadelle de Bourg, comme elle auoit esté bastie par feu Monsieur de Sauoye, exprés pour nuire à la France, elle a esté razée depuis, pour en asseurer la conseruation: L'argent qui a esté employé pour recompenser les seruices & les merites du sieur de Boisse, qui y commandoit, n'incommodera point le Roy, mais plustost soulagera ses finances: car ce n'est qu'une aduance qui sera bien tost recompensee par l'Espargne, de la garnison qui y seruoit, laquelle montoit par annee beaucoup; de façon que ce conseil qui a esté approuué de plusieurs, sera vtile à la France: Tout ainsi que l'argent employé pour retirer le Chasteau d'Amboise des mains de celuy qui le gardoit, le sera aux villes assises sur la riuere de Loire, qui en ont receu, avec le pays de grandes incommoditez durant la guerre, par la garnison qui y estoit: ç'a esté doncques pour mettre ledict pays en seureté, tirer de crainte les habitans d'iceluy, que ladicte recompense a esté donnee. Mon Nepueu, il est facile de descrire les actions de ceux qui manient les affaires publiques, le nombre des mal contens, & enuieux du bien d'autrui est grand, le desir de ceux qui s'ennuient du repos n'est pas moindre: Et combien que depuis le trespas du feu Roy i'aye fauorisé l'ordre Ecclesiastique, celuy de la Noblesse, & faict soulager le peuple tant qu'il m'a esté possible: Toutesfois il semble par vostre dite lettre, que vous pretendez leur faire croire qu'ils ont esté & sont mal traitez: si cōtre mon esperance & la raison, aucuns d'eux se laissent aller à telles inductions, & persuasions, ils esprouueront bien tost apres par experience, & par tels effects, qu'ils

qu'ils auront empiré leur condition. I'ay en toutes choses fuiuy les traces du feu Roy, mondit Seigneur, en leur endroict, pour leur bien faire: I'ay distribué des graces parmy les deux premiers Estats, avec soin & iugement, bien marrie de ne les auoir peu traicter mieux. Tant y a que les gens d'Eglise ont exercé leurs fonctions, & iouy de leurs benefices en toute liberté & seureté. Plus grād nombre de Gentils-hommes de qualité, dedās les Prouinces ont esté gratifiez & fauorisez par moy, que du temps du feu Roy; plus de compagnies de gens d'armes entretenues: Quant à la vête & cherté des offices, & des charges de la maison du Roy, & des prouinces, elle n'a esté introduicte de mon temps, ie recognois & ressents les maux qui en procedent. C'est pourquoy i'ay recherché & tenté les moyens de retrancher & faire cesser la cause principale desdicts excez. Aucunes compagnies souverainnes s'y sont opposees, qui sont d'ailleurs plaines d'affection & de zele au biē public. Leurs raisons qui ont esté balancees au poids de l'interest particulier, ont pour ceste fois, & en ceste occasion, esté approuuees, non de ma volonté, mais par necessité. I'espère que nous pouruoirons à ce desordre, qui n'est des moins domageable à l'Estat, par l'aduis, & avec l'aide desdits Estats generaux. Ie ne diray rien des autres, car ie n'en ay cognoissance que par la plainte generale que vous en faictes. Mais ie sçay bien que plus de personnes de tous estats ont beaucoup plus de sujet de se loüier de leur condition presente, que ne voudroient ceux qui les veulent rendre mal. contens par dessein & par force. Plusieurs se lamentēt & font fruit de certaines commissions extraordinaires, & des impositions du sel, qui sçauent bien que lesdites impositions ont esté moderees depuis ma regence, & la

plus grande partie desdites commissions, reuoquees: Ils forment telles plaintes, & les iettēt aux yeux d'un chacun, plus pour les esblouyr & acquerir creance, que pour soin & intention qu'ils ayent de les en soulager. C'est pour fortifier leurs cabales, & toutesfois i'espere que les plus sages se garderōt biē de chopper contre ceste pierre, la memoire des playes & des miseres & calamitez passees, proueuēs des guerres ciuiles, est encore trop fresche, & viue dedās les cœurs, & les biēs d'un chacun. En tout cas, ie ne doute point que ceux qui se laisseront surprendre aux esperances d'une pretenduē reformation, & d'un soulagement public, par telles voyes ne s'en repentent bien tost. Les Ecclesiastiques cognoistront par la suite de semblables amorces, qu'elles ne sont proposees que pour aduancer la ruine & desolation de leur ordre, avec la Religio Catholique: Mais surquoy est fondee vostre plainte, qui regarde la Sorbonne. L'on a semé à poste dedās ce College venerable, la discorde, pour former vn schisme, non seulement en ceste compagnie, mais en toute l'Eglise Catholique de ce Royaume: I'y ay opposé & employé l'autorité du Roy, & la mienne, non pour nourrir leur diuision, mais par bonnes remonstrances & exhortations, la composer, & en empescher le cours, qui a-il à redire & reprēdre en ceste procedure? autres ne la peuuent trouuer mauuaise, que ceux qui pretendent profiter de ladite diuision, comme trop souuent ils ont fait de celles qu'ils ont introduites, & espandues par tout, où ils ont esté escoutez au contraire d'eux: I'ay soigneusement combatu & trauaillé en tous lieux, pour composer lesdites diuisions, à mesure qu'elles sont venuēs à ma cognoissance, & sçay que ceux qui nous accusent de les auoir entretenues, sont eux qui les ont formees, & en

forcent encores de nouuelles iournellement, autant
 parmy les sujets du Roy, qui sont professiō de la Re-
 ligion pretenduë reformee, que l'on m'a iniustement
 attribuees, qu'à l'endroit des Catholiques, sans en ce-
 la espargner les Princes & les grands du Royau-
 me, en leurs propres maisons & familles, dequoy
 vous & ceux qui vous assistent ne demeurerez
 long temps sans vous ressentir vous-mesmes, & les
 autres aussi, mais ce sera apres que vous serez si auant
 engagez en leurs conseils, que vous ne pourrez plus
 vous en retirer, & desueloper, qu'à leur mercy & dis-
 cretion. Si ie pouuois vous représenter par vne lettre
 les recorts, & presages sur cela du feu Roy, mondit
 Seigneur, ie les vous exposerois volontiers, tant i'ap-
 prehēde pour vous & les autres Princes qui sont pres
 de vous, & pour le public, les disgraces & malheurs
 qui sont ineuitables en la poursuite du dessein auquel
 l'on vous a embarqué: Vous protestez, mon nepueu,
 de vouloir proceder en celle de la susdite reformatiō,
 par moyens legitimes, & non par armes: Je veux croi-
 re vostre intention estre telle, mais prenez garde que
 l'on ne vous engage à pis faire, & sur tout à bastir vn
 party dedans le Royaume, qui sans la permission de
 l'autorité souueraine ne peut estre legitime, si faire
 cela n'est faire la guerre ouuertement, C'est forcer le
 Roy de s'y opposer par toutes voyes, C'est sonner la
 trompette pour les perturbateurs du repos public, &
 introduire, & commencer vne espeece de guerre, pire
 que celle des armes, & partant au lieu de bien faire à
 l'Estat, en aduancer la desolation, i'espere tant de la
 loyauté de ceste genereuse Noblesse, qui a tousiours
 exposé, & respandu liberalement son sang, pour def-
 fendre la personne de son Roy, & son autorité sou-
 ueraine, qu'elle persueuera fidelement en ce deuoir.

nonobstant les artifices, & desguisemens dont l'on use pour la seduire : Je nourriray, & esleueray aussi mon fils en la recognoissance, & remuneratiō du merite & des seruices d'icelle, à l'imitation du feu Roy, son pere, lequel assisté de ladicte Noblesse, coniointe à la faueur du Ciel, & secondee de sa propre vertu, a sauué le vaisseau de la Frâce, du naufrage qu'il a couru par l'entresuite des guerres ciuiles. Les villes ne detesteront, n'y fuiront pas moins les auteurs des causes & partialitez qui engendrerōt semblables effects: Car ils ne peuuent estre si couuerts en leurs desseins publics ou priuez, que les citoyens & habitans desdites villes, soyent pour s'y laisser circonuenir. C'est pourquoy ie leur ay par aduance ordonné de se bien garder, & de ne donner entree en leursdictes villes à personne puissant assez pour s'en emparer, & leur dōner la loy. Car le Roy, mōdit sieur, & fils, & moy, ne pretendons pouruoir à leur seureté, que par l'entiere confiance & assurance que nous auons de leur loyauté, La charge que i'ay m'a obligé à verser de ceste precautiō contre les mouuemens qui freillent. Laquelle ie m'assure, Mon Nepueu, que vous approuuerez, Car elle est faicte non pour nuire à personne, mais pour garentir d'iniure & d'opression, ceux ausquels ie dois protection: Mais pourquoy me recommandez vous par vostre dite lettre, le retour du Cheualier de Vendosme aupres du Roy, puisque c'est chose que vous sçauiez que i'ay ordonné, il y a plusieurs mois il n'a esté retardé que pour le rendre porteur de l'obedience, qu'il faut que le Roy rende à nostre S. Pere le Pape, & au saint siege deuë à cause de son aduenement à la Couronne: Pretendez vous quelque aduantage de son retour, & de sa presence aupres du Roy, ou si c'est par pure charité, & affection que vous fai-

etes ceste instance. Vous sçauiez que ie sçay quels ont
 esté, & iusques ou peuuent encores s'estendre les
 conseils & proiects des principaux antheurs de nos di-
 uisions. Ie ne m'expliqueray pas plus auant, Il suffit
 que i'aye recogneu & esprouué la portee de leur confi-
 cience. Or mon Nepueu pour finir & conclure la
 presente, le vous représenteray de nouveau, par for-
 me de repetition, que pour veritablement faire ces-
 ser les desordres & excez. que vous pretendez auoir
 cours en ce Royaume. Il faut faire tout le contraire
 de ce que vous faites: Premièrement vous ne deuez
 vous tenir esloigné du Roy, ny de moy, comme vous
 faites, ains nous fortifier au plustost de vostre assitan-
 ce avec laquelle nous pouuons facilement pourueoir
 à toutes choses necessaires pour le bien de tous: Secõ-
 dement, Vous ne deuez authoriser de vostre nom,
 vne diuision entre les Princes, Seigneurs, & maisons
 Catholiques du Royaume, laquelle a esté indubita-
 blement forgee par tels, qui peut estre n'esperent pas
 moins en profiter quel que iour, à vostre propre dom-
 mage qu'au mien: Finalement, vous deuez vous ab-
 stenir de blasmer publiquement, comme vous faites,
 le gouuernement des affaires, & les Officiers qui y
 seruent, mesmes deuant que de vous en estre adres-
 sé à moy en particulier: Mais chacun ne cognoist que
 trop clairement aussi, que vous vous adressez à moy
 plustost qu'à eux. Pareillement vous ne deuez per-
 mettre estre dressé des partis dedans l'Estat, y estre se-
 mé des schismes, diuisions, & detractiõs, le gouuerne-
 ment descrié, Que l'on se plaigne des graces que i'ay
 faites, qui sont appellees maintenãt prodigalitez, par
 ceux qui en ont recueilly, & employé le fruiet à leur
 aduantage, estre dõné attainte à la paix publique, sage-
 ment, & heureusement maintenue de puis quatre ans

contre les diuers assauts & artifices employez pour la renuerſer, exciter & eſmouuoir le Clergé, & la Nobleſſe, avec les habitans des villes, & le peuple, meſmes les compagnies ſouueraines, & tous les officiers à meſcontentement. Vouloir expreſ retarder les mariages contractez, pour puis apres les renuerſer avec la paix de la Chreſtienté, apres auoir eſté approuuez par vous, & en auoir vous meſmes ſigné les contractz, ny permettre auſſi en eſtre donné ialouſie aux ſuiectz du Roy, & à nos voiſins, & faire celer expreſ à meſme fin le mariage qui ſe traite en Angleterre: Bref, interpreter à mal tout ce qui a eſté fait, & qui a neantmoins heureuſement ſuccedé au bien, & aduantage des affaires du Roy dedans & dehors le Royaume, depuis le trespas du feu Roy mondit ſeigneur: Car faire toutes ces choſes, & les accompagner encore de toutes ſortes de practiques, enrollemens de gens de guerre, & recherche d'eſtrangers, il faut que ie vous die, avec la meſme liberté que vous m'auiez eſcrit, & adreſſé voſtre dite letre, & l'auiez depuis ſemée, & eſpandue par tout. que ce n'eſt le droit chemin qu'il faut tenir, pour veritablement reformer l'Eſtat par moyens legitimes comme vous le proteſtez. Et demandez encore en ſuitte de cela, vne aſſemblée conditionnee de ſeureté, & de liberté, c'eſt à dire, à la mode & au gouſt de ceux qui vous donnent tels conſeils, qui, peut eſtre, ont dés à preſent pour but, (ſous preſtexte de ceſte pretendüe ſeureté, & liberté) d'en renuerſer & empescher du tout l'effect, comme ie vous ay cy deuant dit, par où il ſemble que l'on n'ait autre viſée que, d'eſblouyr les yeux d'un chacun, par la propoſition de la dicte aſſemblée, pour faire croire que ie l'apprehende avec ceux qui ſeruent le Roy aupres de moy & neantmoins nous la deſirons plus que tous.

& esperé que nous en profiterons aussi pour le bien,
 & le seruice du Roy, & du Royaume, plus que tous.
 Au moyen dequoy, mon Nepueu, si vous voulez que
 le Roy, & moy, & tous ses bons seruiteurs & subiets,
 croyons que vous aspirez veritablement à la susdite
 reformation, par bons, & legitimes moyens, & en in-
 tention de bien faire. Châgez, ie vous prie, vostre cō-
 duite & procedure, car indubitablement celle que
 vous auez choisie auancera, & augmentera plustost
 la confusion, & les desordres, qu'elle ne les retran-
 chera, à la desolation generale du Royaume, & partāt
 à vostre desaduantage, comme au nostre, & reuenez
 nous trouuer avec ceux qui sont conioints avec vous
 en ce proiet. Vous, & eux y serez receus avec hōneur,
 & confiance, faisans cesser par effect toutes sortes de
 menees & pratiques qui ont cours par les prouinces
 du Royaume & au dehors, que personne n'entre en
 doute des armes du Roy, Car elles seront emplo-
 yees à la deffence commune & indifferente de tous.
 Aduançons en diligence, & attendons avec patience,
 le succez de ladicte assemblee generale des Estats du
 Royaume, si l'y a du mal au maniemēt des affaires
 publiques, & de l'excez de pouuoir en ceux qui les
 manient (jaçoit que ie ne me sois apperceuë qu'il en
 ayt esté abusé) i'y remedieray avec vous. Partant ie
 vous conuie derechef, & coniure par l'interest que
 vous auez au bien de ce Royaume, de vous rendre
 auprès du Roy au plustost, & deuant que les maux
 (qu'engendre vostre esloignement, & le chemin que
 vous auez ouuert) prennent plus profonde racine,
 vous y trouuerez la place qui vous y est deuë, elle
 vous est reseruee entiere avec soin & affection, par le
 Roy, mondit sieur & fils, comme par moy: Il est,
 graces à Dieu, dotië d'un esprit & naturel plein de

benignité & de vigueur : Il est nourry & esleué en la crainte de Dieu, & à discerner & recognoistre ceux qui l'affectionnent à la proportion de leurs qualitez, merites & seruices: Je vous promets qu'il vous cherira cōme vostre sang veut qu'il face, & ie remedieray facilement avec vous aux pretendues inegalitez & differences que vous dictes apparoir en ses deportemens: En fin ie continueray à contribuer de mon costé les offices & enseignemens qui dependent de moy, tant enuers luy, qu'ailleurs, pour vous donner tout sujet de vous louer de ma bien-veillance, & à tous les autres, de ma conduite en toutes choses. A tant ie prie Dieu, mon Nepueu, qu'il vous ayt en sa sainte & digne garde. Escrit à Paris le 27. iour de Feurier 1614.

*Vostre plus affectionnée
Tante,*

M A R I E.